

1 Juan

Cristo pwele ishim oso ör ikerit uje yelij nihna ire.

1 ¹Tichew ana hutita par tokosim olak titim olak Jesucristo. Uje ehn yahpaa irmo chihikite ichii ire shish de. Uje ehn de nāhu irmo ich oyunt uje ire tata, hn oyumo pishi ire, hn oyakihir ir toy. Wichí uje tata lahwošo uje ich ũru hn pwele ishim oso ör ikerit uje yelij nihna ire. ²Ire de nāhu irmokite hn öryok oyumo heke oyiraha hn oyitim olak uje Jesús wichí uje yelij nihna ire. Ire shish de Porrosht ahirkite per shuu tirēt heke oyumo ire, ³hn oyanimirāha oyitim olak uje oyumo Jesucristoni hn oyunt uje tata par uje olak aho kīsīhi öryok, hn öryok aho kīsīhi eyok Deych Porrosht hn ir Ijit Jesucristo, heke olak aho kīsīhi ör toy. ⁴Oyichew ana hutita oyosim olak par uje uhu olak aho ma kīs itso öryok.

Porrosht hüre shi itso luu.

⁵Titim olak erze ahwoso uje Jesucristo tatim öryökni. Tatim öryok uje Porrosht hüre shi itso luu. Nihyok dihlele de ire ahir hni pikaap. ⁶Uje yiita uje eyok owich omīhi Porrosht per shish yiyokörlo uje mīhnik shi itso uje yirkīhi dihlelta ehēt ich shi yiita eyok ukushī. ⁷Per uje yiyokörlo uje Porrosht sahmūr ich shi itso uje luu chihit eyok pork shuu yiraha uje ich ũru. Porrosht hüre shi itso uje luu chihit, heke uje yiyokör uje Porrosht sahmūr ich eyok aho kīsīhi ire hn eyok aho kīsīhi eyok leshībo pork uje ir ijit Jesús tokite ich ir armista noshi hn nos ishi eyok hnitewīhi Porrosht ahir hn nos perdonar erze mīhnūwo uje yiyokörlo. ⁸Kimiji yitilo uje yelij yiyokörlo uje mīhnik uje Porrosht ye nahmūrpe ich shi yehnyërlo eyok hn ye yitilope uje ich ũru. ⁹Per uje yitimlo Porrosht uje yiyokörlo uje mīhnik ich ire perdonar eyok erze kuche mīhnūwo uje yiyokörlo uje ire ye nahmūrpe. Yirahalo uje Porrosht yelij seyhi lahwošo. Wichí jwe uje shish shiyokör uje ich om heke nos churhū erze kuche mīhnūwo uje de eyok aho. ¹⁰Kimiji yitilo uje yelij yiyokörlo uje mīhnik uje Porrosht ye nahmūrpe, ich yuhulo Porrosht kushiyak. Ye yahmūr uje ir ahwoso tata.

Jesús sapur Porrosht par sosir eyok.

2 ¹Pishībo watsaklo, tahmūr olak heke shi olak itso pijo. Tichew ana hutita tokosim olak par uje ye ahakörlo uje mīhnik uje ye Porrosht

nahmūrpe. Per kimiji eyok yeëk niyokōr uje mīhnik ich Jesucristo de par sosir ire. Sapur ir Deych par ese uje shiyokōr mīhnik. Wichi shish shiyokōr uje ich om. ²Wichi uje ishi eyok hnitewihi Porrosht ahir. Ye doshipe shi par eyok, ishi par nos wir oso toy uje ode nāhu ĩrmo.

³Kimiji yiyokōrlo uje ire ahwoso tata ich yirahalo uje ich ũru uje eyok ir aabo. ⁴Per kimiji yeëk tata uje ire Porrosht aap hn ye niyokōrpe uje Porrosht ahwoso tata ich wichi shi kushiyak. Porrosht ahwoso ich ũru, per wichi ye nahmūrpe. ⁵Uje yeëk niyokōr uje Porrosht ahwoso tata ich imeheeych uje ich ũru uje wichi sahmūr Porrosht, heke yiraha uje eyok aho kiisihi Porrosht yuhu itsorz. ⁶Kimiji yeëk tata uje ire de Porrosht ich tyenij shiyokōr shuu deluuta itso Jesucristo ir iluuta.

Porrosht sehe duhu oniyokōr kuche ahlo.

⁷Pishibo watsaklo, ahnūwo pahwoso uje titim olak par uje ahmūrloye wir ye ahwoso ahlope. Nāhu uje tenitkite ichii entlo. ⁸Erze uje tichew tibite ana hutita tokosim olak nāhu ahwoso ich ma imeheeych heke itso uje ahlopo. Ahnūwo ich ũru pork Cristo shiyokorāha oso tatim ōr uje ich ahlo shuu itsorz. Hn ich ũru par olak pork ahmūrloye pork amsahalo par olak Porrosht aabo. Nāhu ahwoso ich shi itso ahlo par olak pork ichii atokolihilo dihlelta ehēt hn luu chihit olak hn shuu erahalo uje ich ũru. ⁹Kimiji yeëk tata uje ire Porrosht aap hn tata uje luu chihit ire per sitak leshibo ich ye luu chihit irpe. Wichi yesh de dihlelta ehēt. ¹⁰Per ese uje sahmūr leshibo shish luu chihit ire hn nihyok kuche uje de wichi ehēt par uje shuu shiyokōr uje mīhnik. ¹¹Per ese uje sitak leshibo shi itso uje shish dechi dihlelta hn dirkihi ehēt. Ye diraha uje tīr, pork asa dihlelta shuu itso uje wichi olibik.

¹²Pishibo watsaklo, tichew ana hutita tokosim olak. Shi olak itso pijo pork Jesucristo ishi eyok hnitewkite heke Porrosht perdonar olak erze kuche mīhnūwo uje ahakōrlo uje ire ye nahmūrpe. ¹³Tichew ana hutita tokosim olak uje olak ilaro pork erahalo Cristo uje dekite ehn yahpaa ĩrmo chihipe. Tichew ana hutita par tokosim olak uje yahpaa olak ilarope pork erzlo Satanasni hn atokolihilo ir hme. Pishibo watsaklo, tichew ana hutita tokosim olak pork olak shi olak itso pijo. Erahalo Porrosht uu eyok Deych. ¹⁴Tichew ana hutita tokosim olak uje olak ilaro pork erahalo Cristo uje dekite ehn yahpaa ĩrmo chihipe. Tichew ana hutita tokosim olak uje yahpaa olak ilarope pork olak ukurbo de hn olak eyuwo chishew Porrosht ahwoso. Erzlo ese Satanasni hn atokolihilo ir hme. ¹⁵Tyenij ye ahmūrlo erze mīhnūwo uje de nāhu ĩrmo hn ye ahmūrlo erze kuche uje de nāhu ĩrmo. Yeëk uje sahmūr erze ich ye nahmūr Porrosht uu eyok Deychpe ¹⁶pork erze uje otsahmūr nāhu ĩrmo wir ōr iluu itsorz. Otsahmūr oshiyokōr erze mīhnūwo uje oshuu deyuwo chishew hn oteychim erze kuche mīhnūwo uje de nāhu ĩrmo, hn sehe oniyokōr

hn onarim ire. Erze òr iluu ye tãra Porroshtpe. Shi de nãhu ãrmo ¹⁷per ahnũwo ãrmo tyenij Porrosht sihna nehe. Nos wir kuche mihnũwo uje oso otsahmũr oshiyokorãhi nãhu ãrmo nos sihna. Shi erze uje shish oshiyokõr uje Porrosht sahmũr wir uje shish òr ika.

Ahwoso de uje ich ùru hn de uje ye ùrpe.

¹⁸Pishibo watsaklo, tahmũr olak heke shi olak itso pijo. Entloni uje tyenij yeẽk taãcha nehe uje wichi Cristo imãha uje iich otsii anticristo. Ele ahle ich oso ode ich okihniya uje wir Cristo ir imãho, heke yirahalo uje ich yej terihi ãrmo uhurc. ¹⁹Wap oshuu ire itso uje òr Porrosht aabo per oym eyok pork nos wir òr ire ye òr Porrosht aabope. Kimiji wir Porrosht aabo ich shish òya eyoklo per uje oym eyok ich shuu imeheeych uje wir ye Porrosht aabope.

²⁰Olak ye olak ilo òrpe pork Porrosht shuu Dechibich masaha olak aho heke nos erahalo uje ich ùru. ²¹Shi tichew hn tokosim olak ana hutita pork erahalo uje ich ùru, hn erahalo uje erze uje ich ùru yelij kushiyak. ²²Yeẽk uje tata uje Jesús ye Cristope wichi kushiyak. Wichi Cristo imãha. Sata Porrosht uu eyok Deych hn sata ir ijit Jesucristo. ²³Nos wir erze uje otsata Jesucristo wir ye òr aho kiisihi Porroshtpe uu eyok Deych. Per kimiji yeẽk tata uje Jesús wichi Cristo uje ishi ir hnitewihi Porrosht ahir wichi ir eheth kiisihi Cristo hn eheth kiisihi eyok Deych Porrosht toy.

²⁴Ye moymlo erze ahwoso uje oshiyokorãha olak wapni. Kimiji ye moymlo erze uje entloni uhulo itsorz ich shish olak de Jesús hn shish olak de eyok Deych Porrosht. ²⁵Heke Jesús chibite lahwosni par uje ishim eyok ikirĩt uje yelij nihna ire.

²⁶Tichew tibite ana hutita par tuu erahalo uje ode uje sehe onehnyẽr olak ²⁷per Porrosht ishim olak Dechibich par uje debuhu olak aho hn shuu erahalo uje ich ùru, heke ye nesita uje yeẽk shiyokorãha olak. Shi Porrosht Ichibich nos shiyokorãha olak kuche uje ich ùru, ye kushiyakpe. Uhu olak aho kiisihi Cristo shi itso uje Porrosht Ichibich shiyokorãha olak.

²⁸Olak shi olak itso pijo. Shish uhu olak aho kiisihi Cristo, heke uje taãcha nehe ich eyok aho kiisihi ire ile ikich hn ye yipooklope par uje sehe yakis eyok. ²⁹Erahalo uje Jesucristo ir iluu shish om, heke erahalo uje ich ùru uje nos wir uje òr iluu om wir Porrosht aabo.

Porrosht sahmũr pishi daabo.

3 ¹Hmeychimlo, ich Porrosht uu eyok Deych sahmũr pishi eyoklo heke tata uje eyok ir aabo. Ich ùru uje eyok ir aabo. Erze uje ye òr Porrosht aabope ye odiraha uje eyok Porrosht aabo pork wir ye odiraha Porroshtpe. ²Pishibo watsaklo, ele ahle ich eyoklo Porrosht ir aabo. Deeych yet nehe hn Porrosht shuu eyok yũhurra kinaha per yahpaa

yirahalo keshi eyok yūhurrza ilo latikpo nehe. Shi shuu yirahalo uje Jesucristo cheeshpo nehe ich eyoklo yūhurrza ahle itso ire pork yomlo pishi Jesús ir yūhurrza. ³Nos wir erze uje oyeem uje Porrosht shuu ōr yūhurrza itso Cristo nehe wir oshuu deluu om pork Cristo ir iluuta ich om.

⁴Nos wir erze uje oshiyokōr kuche mihñūwo uje Porrosht ye nahmūrpe wir ich oyuwe Porrosht ir ley pork uje yeēk iyuwe Porrosht ir ley ich shiyokōr wir kuche mihñūwo uje ye Porrosht nahmūrpe. ⁵Erahalo uje Jesucristo tīrēt tīr nāhu irmōkīte par uje ishi eyok hñitewihī Porrosht ahīr pork yiyokōr erze kuche mihñūwo uje ye Porrosht nahmūrpe per Jesús yelij niyokōr kuche mihñūwo uje Porrosht ye nahmūrpe. ⁶Nos wir erze uje ode Cristo ye oduhu kuch mihñūwo yakaha irpe. Nos wir uje shish oshiyokōr uje mihñūwo wir ye odīraha Cristope hn ye odīraha ir iluupe. ⁷Pishībo watsaklo, shi olak itso pijo. Ye uhu onehnyēr olak. Yeēk uje shish shiyokōr uje om wichi ir iluu om. Heke ir iluu shi itso Cristo ir iluu uje ich om. ⁸Per ese uje shish shiyokōr uje ich mihñūwo wichi dyablo aap. Uje ehn yahpaa Porrosht niyokōr nāhu irmōkīte ichii dyablo shish shiyokōr uje mihñūwo. Heke Porrosht ir Ijīt tīrēt tīr nāhu irmōkīte par uje sihna erze dyablo ir ibiyo. ⁹Nos wir uje Porrosht shuu oshūrhapo wir Porrosht aabo. Heke yelij oduhu erze kuche mihñūwo yakaha ire pork ye ōr pwele oduhu erze mihñūwo yakaha irpe pork Porrosht shuu oshūrhapo par uje omasaha par ir aabo. ¹⁰Heke ich imeheeych uje yeniipo Porrosht aabo hn yeniipo uje dyablo aabo. Yeēk uje ye shish niyokōr uje om wichi ye Porrosht aappe. Itso ese uje ye nahmūr leshībope wichi ye Porrosht aappe.

¹¹Heke ich imeheeych itsorz pork wapni ichii otsanimirāha otatim olak uje tyenij nos ahmūrlo olak leshībo, ¹²hn ye uhu olak ilo Caín. Wichi dyablo aap pork shuu leshībich lishi shuu toy. ¿Inaapo heke Caín shuu leshībich shuu toy? Shi pork ir leshībich ibiyo ihīrtso hn ir ibiyo mihñūwo.

¹³Pishībo watsaklo, ye as olak ibe uje erze uje ye odīraha Porroshtpe otsitak olak. ¹⁴Yirahalo uje eyoklo shi itso uje yitokolihilo ese dehet uje tīr urhuta bahluta ehēt hn yomsahalo ese dehet uje tīr Porrosht ahīr. Ese dehet wichi par erze uje ōr ikirīt de uje yelij nihna ire. Yirahalo uje yirkihilo ese dehet pork yahmūrlo eyok leshībo. Ese uje ye nahmūr leshībope wichi shish dechi ese uje itso dehet uje tīr urhuta bahluta ehēt. ¹⁵Nos wir erze uje shish otsitakpa leshībo par Porrosht ich ōr itso uje oshuu leshībo oshuu otoy. Erahalo erze uje oshuu oso oshuu otoy wir ye ōr ikirīt chihipe uje yelij nihna ire. ¹⁶Ich imeheeych uje Jesucristo sahmūr pishi eyok pork ishīm ire erze oso par uje oshuu oshuu toy par uje ishi eyok hñitewihī Porrosht ahīr. Heke tyenij yahmūrlo pish eyok leshībo yuhulo itso uje Jesucristo sahmūr eyok. ¹⁷Kimijī eyok yeēk chīhi

uje ir kushjäro kihniya de hn teychim deshībich uje nesita kuchit hn ye nuunape uje wichi losuhlaap hn ye dosimpe uje wichi nesita ich ye nahmūr deshībichpe. Porrosht chibite par uje yahmūrloye per wichi ye nahmūr leshībichpe pork ye dosir irpe.

Porrosht aabo ye opookpe uje otīr ir ikich nehe.

¹⁸Pishibo watsaklo, shi olak itso pijo. Ye ompe uje shi olak ahwoso uje ahmūrloye. Tyenij uhulo ūru hn imeheeych uje ahmūrloye uje akashimloye. ¹⁹Heke yirahalo uje ich ūru uje eyoklo Porrosht aabo hn ye yipooklope uje yitīr ire nehe. ²⁰Uje yuuna uje yiyokōr uje mīhnik hn ese mīhnik sehe duhu eyok koswāha Porrosht ich Porrosht ma dich pork chiraha hn pwele nishii erze uje sehe duhu eyok koswāha ire. ²¹Pishibo watsaklo, uje ye yiyokōrlo uje mīhnik heke ich ye yuuna latik hn eyok aho kiis uje eyok orar yapur Porrosht. ²²Hn uje yapurlo ire kuche ich ishim eyok pork yiyokōrlo uje ir ahwoso tata hn yiyokōrlo uje ire sahmūr. ²³Erze uje Porrosht sehe duhu yiyokōrlo wichi uje ye yotiislo ir Ijit Jesucristo hn yahmūrloye. Wir uje sehe duhu yiyokōrlo. ²⁴Nos wir uje oshiyokōr uje ir ahwoso tata wir ode ire hn ire itspo de ōr toy. Yirahalo uje ire de eyok pork ir Ichībich de eyok aho.

Ichībiyo kināho de uje Cristo ir imāho.

4 ¹Pishibo watsaklo, tyenij uhulo olak eyuwo tisir kimiji ich ūru o kimiji ye ūrpe nos wir erze ōr ahwoso uje otata uje Porrosht shuu oshiyokorāha olak kuche. Tyenij eychimlo ōr wap kimiji Porrosht Ichībich chihī ōr aho o kimiji ichībich kinaha, pork ich okihniya ode nāhu ĩrmo uje otata uje otsanimirāha Porrosht ahwoso per ye ūrpe uje ōr ire otata. ²Par uje erahalo kimiji Porrosht Ichībich chihī ire ehēt uje sanimirāha Porrosht ahwoso ich wichi tyenij tata uje Jesús wichi Cristo uje tāra Porrosht hn ishi oso ōr hñitewihī Porrosht ahir hn tyenij tata toy uje Jesús wichi hnakirbich pisht. Uje tata itsorz ich Porrosht Ichībich de ire ehēt. ³Uje ye yeēk tata Jesús shuu itsorz ich ye Porrosht Ichībich chihī ire ehētpe. Shi ichībich kinēhet de ehēt. Wichi Cristo ir imāha. Olak ich entloni uje ese ichībich kinehe de nehe. Ele ahle ich de nāhu ĩrmo.

⁴Pishibo watsaklo, shi olak itso pijo. Olak Porrosht aabo hn erzloni erze uje otsehnēr oso pork ese Porrosht Ichībich uje de olak aho wichi ma ukurbo deyo de je ese Satanás uje de nāhu ĩrmo uje shuu oso oshiyokōr uje mihñūwo. ⁵Ōr owich shi de nāhu ĩrmo heke uje otata lahwoso ich shi otata kuche uje de nāhu ĩrmo hn erze uje ye ōr Porrosht aabope otsahmūr ōr ahwoso. ⁶Eyoklo ye eyok ilo ōrpe pork eyoklo Porrosht aabo. Erze uje otsahmūr Porrosht ich otsahmūr eyok ahwoso per erze uje ye ōr Porrosht aabope ye onahmūr eyok ahwospe. Heke yirahalo yeniipo Porrosht Ichībich de ōr aho. Porrosht Ichībich shish tata uje ich ūru, hn yeniipo uje ichībich kinēhet de ōr aho. Wir shi otata dekushiī.

Porrosht sahmūr oso.

⁷Pishibo watsaklo, eyoklo tyenij yahmūrloye pork Porrosht wichi uje chibite eyok aho par uje yahmūrloye. Heke nos wir erze uje otsahmūrye ich imeheeych uje Porrosht shuu oshūrhaponi par omasaha par ir aabo hn wir uje ochiraha Porrosht. ⁸Ese uje ye nahmūr leshibope wichi ye diraha Porroshtpe pork Porrosht nos sahmūr oso. ⁹Porrosht shuu imeheeych uje sahmūr eyoklo pork shuu deyjīt nohmīramīt tirēt tīr nāhu irmōkite par ishi eyok hnitew par uje eyok ikirīt de uje yelij nihna ire pork ye yotiis Porrosht ijītpe. ¹⁰¿Ilo latīkpo uje Porrosht sahmūr eyok? Wichi ye ilo uje yahmūrlo irpe. Porrosht sahmūr pishi eyoklo heke shuu deyjīt tirētni tīr nāhu ĩrmo par uje ishi eyok hnitewihi Porrosht ahir.

¹¹Pishibo watsaklo, Porrosht sahmūr pishi eyoklo shuu itsorz heke tyenij yahmūrloye. ¹²Nīhyok yeēk uje umo Porrosht per kimiji shish yahmūrloye ich Porrosht debuhu eyoklo aho hn shuu yahmūrlo pishye. ¹³Yirahalo uje eyoklo aho kiisihi Porrosht hn ir itspo ehēt kiisihi eyoklo pork ishim eyok Dechibich. ¹⁴Ōryok oyeychim Jesusni hn oyitim olak uje Porrosht shuu Deyjīt tirētni par uje ishi oso ōr hnitewihi Porrosht ahir.

¹⁵Uje yeēk tata uje Jesús wichi uu Porrosht Ijīt pishit uje ishi oso ōr hnitewihi Porrosht ahir ich Porrosht de ire hn ire itspo de Porrosht. ¹⁶Heke yiraha hn ye yotiispe uje Porrosht sahmūr eyok. Porrosht shish sahmūr oso. Uje yeēk shish sahmūr leshibo wichi de Porrosht hn Porrosht itspo de ire. ¹⁷Uje ehn eyok de nāhu ĩrmo kimiji yahmūrlo pishi Porrosht ich shi eyok iluu itso Jesucristo ir iluu, heke ye yitililo uje yitīrlo ire ikich nehe uje sepyēr erze uje oshiyokōr uje mīhnūwo. ¹⁸Kimiji ahmūrlo pishi ire ich ye atililope uje etīrlo ir ikich. Shi oso otola ire pork ochiraha uje tyenij sepyēr ōr nehe. Ese uje tola tīr Porrosht ikich nehe wichi yērij nahmūr pishi Porrosht. ¹⁹Nos yahmūrlo Porrosht pork ir wapkite uje sahmūr eyok.

²⁰Kimiji yeēk tata im: —Yok tahmūr Porrosht— per sitak leshibich, wichi shi kushiyak. Kimiji ye wichi nahmūr leshibich uje teychim ich ye pwele nahmūr Porroshtpe pork yelij teychim. ²¹Jesucristo tatim ōryok uje yeēk sahmūr Porrosht ich tyenij sahmūr leshibo toy.

Porrosht aabo otserz uu kuche mīhnūwo.

5 ¹Nos wir erze uje ye olotiis Jesús uje wichi uu Cristo uje ishi ōr hnitewihi Porrosht ahirkite ich wir Porrosht aabo. Uje yeēk chihī uje sahmūr deych ich sahmūr daabo toy, ²heke ich imeheeych uje yahmūrlo Porrosht ir aabo pork yahmūrlo Porrosht hn yiyokōrlo uje ir ahwoso tata. ³Ich imeheeych uje yahmūrlo Porrosht pork yiyokōrlo uje ir ahwoso tata. Ir ahwoso ich ye ihnepe par uje oshiyokōr. ⁴Heke nos wir Porrosht aabo otserz erze kuche mīhnūwo uje de nāhu ĩrmo pork ye oniyokōrpe. Shi

pork ye yotiislo Jesuspe heke yertzlo erze kuche mihñūwo uje de nāhu ĩrmo. ⁵ ¿Yeẽkpo uje serz erze kuche mihñūwo uje de nāhu ĩrmo? Shi ese uje ye lotiis uje Jesús wichi Porrosht Ijít. ⁶ ĩmeheeych uje Jesucristo wichi Porrosht ijít uje Juan tohirm ire, hn ĩmeheeych toy uje tooho krus eeych. Ye shi ĩmeheeychpe uje Juan tohirm ire. ĩmeheeych toy uje tooho krus eeych hn ir armista noshi. Porrosht Ichibich shuu ĩmeheeych toy uje wichi uu Porrosht ijít uje ishi eyok hñitewihi Porrosht ahirkite pork Porrosht Ichibich shish tata uje ich ũru. ⁷ Heke erze uje shuu ĩmeheeych uje Jesús wichi uu Porrosht ijít pisht wir tre. ⁸ Erze tre wichi Porrosht Ichibich hn wichi yet uje Juan tohirm ire hn wichi yet toy uje tooho krus eeych hn ir armista noshi. Erze tre shuu ĩmeheeych uje Jesús wichi uu Porrosht ijít pisht.

⁹ Eyok yibite uje ich ũru erze ahwoso uje hnakirbo otata per ich ma ũru erze ahwoso uje Porrosht tata. Erze ahwoso uje Porrosht tata wir erze tre uje shuu ĩmeheeych uje ir ijít wichi Jesucristo. ¹⁰ Yeẽk uje ye lotiis Porrosht ir Ijít ich Porrosht Ichibich de wichi eheth hn shuu ĩmeheeych uje Jesús wichi Porrosht ir Ijít. Ese uje sotiis uje Porrosht tata wichi shi chibite uje Porrosht kushiyak pork sotiis erze ahwoso uje Porrosht tata uje Jesús wichi ir Ijít. ¹¹ Erze uje Porrosht tata wir par ishím eyok ese ikirít uje yelij nihna ire shi uje ye yotiis uu ir Ijít. ¹² Yeẽk uje ye lotiis Porrosht ir Ijít ich ese ikirít de ire uje yelij nihna ire, per ese uje sotiis Porrosht ir Ijít ich ye ese ikirít chihi irpe uje yelij nihna ire.

Porrosht aabo ōr ikirít de Porrosht ahir.

¹³ Tichew ana hutita tokosím olak uje ye otiislo Porrosht Ijítpe par uje erahalo uje ich ũru uje ese ikirít de olak uje yelij nihna ire.

¹⁴ Yirahalo uje ich ũru uje eyoklo orar yapurlo Porrosht kuchit uje ich om ich chunt eyoklo, ¹⁵ hn uje yirahalo uje chunt eyoklo uje yapurlo ire kuche ich yirahalo toy uje ishím eyoklo uje yapurlo. ¹⁶ Uje eyok yeẽk nomo deshíich uje shiyokōr uje mihñik uje ye duhu wichi tope nehe ich tyenij sapor Porrosht par uje perdonar wichi par uje ye wichi toy. Porrosht shi perdonar wichi kimiji ye niyokōrpe ese kuchit mihnt uje shuu otoy. Kuchit mihnt de uje shuu otoy. Ye titim olakpe par uje olak yeẽk orar lapur Porrosht par ese. ¹⁷ Nos wir kuche uje ye Porrosht nahmūrpe wir mihñūwo. Kuche mihñūwo de uje Porrosht ye nahmūrpe uje ye duhu otopo pork Porrosht pwele perdonar.

¹⁸ Yiraha uje ese uje Porrosht shuu shūrhapo par ir aap ich ye duhu erze kuche mihñūwo yakaha irpe. Porrosht Ijít wichi uje tibey ire, hn ye Satanás pwelpe par uje shiyokōr mihñikīhi ire. ¹⁹ Yirahalo uje eyoklo de Porrosht hme, hn erze oso uje ode nāhu ĩrmo ode Satanás hme, ²⁰ hn yirahalo toy uje Porrosht ir Ijít tirētkite par uje shuu yirahalo Porrosht pisht. Eyoklo aho kiisihi Porrosht pisht, hn eyoklo aho kiisihi ir Ijít

Jesucristo. Jesucristo wichi Porrosht pisht. Wichi uje ishim eyok ese ikirĩt uje yelij nihna ire. ²¹Pishibo watsaklo, shi olak itso pijo. Abeylship olak par uje ye eeychãhalo porrosht kinãho.